

# Tuttut nujuartat illersugaanerat piniagaanerallu pillugit Namminersorlutik Oqartussat nalunaarutaat

Pinngortitamik illersuineq pillugu Inatsisartut inatsisaanni nr. 29-mi, 18. december 2003-meersumi, § 5, imm. 1, nr. 1-5-imut aamma § 60, imm. 2, Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-meersumi, § 2, imm. 4, § 7, imm. 4, § 8, imm. 1, nr. 7, §§ 12-13, § 17, imm. 2 aamma §18, Inatsisartut inatsisaatigut nr. 1-ikkut, 16. maj 2008-meersukkut kingullermi allannngortinneqartumi naapertorlugit kiisalu Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18-imi, 30. Oktober 1998-meersumi § 3, imm. 2, Inatsisartut inatsisaatigut nr. 23-kkut, 22. November 2011-meersukkut allannngortinneqartumi, naapertorlugit aalajangersarneqarpoq:

## Kapitali 1

### *Atuuffi*

§ 1. Nalunaarut manna Kalaallit Nunaanni tuttut nujuartat (*Rangifer tarandus*) illersorneqarnissaannut piniagaanerannullu atuuppoq.

## Kapitali 2

### *Eqqissimatitsineq*

§ 2. Tuttut nujuartat nuna tamakkerlugu eqqissimatitaapput, § 3-mi taaneqartut eqqaassanngikkaanni.

*Imm. 2.* Akiliuteqarluni nujuartanik tutturniarsinnaanermut piumasarineqartut allat immikkut akiliuteqarluni aallaaniarneq aalisarnerlu pillugit nalunaarummi malittarisassaqartinneqarput.

*Imm. 3.* Tuttut "nujuartat" tassaapput tuttut aqutsiveqarfinni assigiinngitsuni aallaqqaammulli nunap tuttui, Peary tuttut kiisalu tuttut nunaminertaniit tuttnut nujuitsunut atorneqar-tuniit aninikut, nalunaaqutserneqarnikuunngitsut ukiumillu ataatsimik sinnilimmik utoqqaassusillit nujuartatullu taaneqarsinnaalerlutik. Uani nalunaarummi tuttut nujuartat matuma kingorna tuttnik taagorneqassapput.

## Kapitali 3

### *Pisassiisutit, piffissat piniarfusussat kiisalu piniarfusussat*

### *Pisassiisutininik agguaassineq aalajangersaanerlu*

**§ 3.** Uumassuilinnik misissuisunik siunnersuuteqareernerup kingorna Piniarnermut Naalakkersuisoq tuttnik piniarsinnaanermut pisassiissutinik aalajangersaassaaq. Uumassuilinnik misissuisunik siunnersuuteqartoqanngippat mianersornissaq tunngavigalugu pisassiissutinik aalajangersaasoqassaaq.  
*Imm. 2.* Piniarnermut Naalakkersuisoq nunap ilaanut pisassiissutinik aalajangersakkanik agguaassissaaq.  
*Imm. 3.* Piniarnej pillugu Siunnersuisoqatigiit aamma Kattuffiit suliamut attuumassuteqartut allat apeqqutini imm. 1 aamma 2-mut tunngassuteqartuni tusarniarneqassapput.  
*Imm. 4.* Sumiiffimmi tuttnik pisassiissutinik agguaassinermi aqutsiveqarfinni pineqartuni Kattuffiit attuumassutillit tusarniarneri kommunimi oqartussat ingerlattarpaat.  
*Imm.5.* Kommunimi oqartussat Piniarnermut Naalakkersuisoqarfimmut pisassiissutinik agguaassinermi angusat inerneru pillugit imm. 4 naapertorlugu allakkatigut nalunaaruteqas-sapput.

*Piffissanik piniarfusussanik aalajangersaaneq*

**§ 4.** Uumassuilinnik misissuisunik siunnersuuteqareernerup kingorna Piniarnermut Naalakkersuisoq pisassiissutinik piniarnissamut aamma akiliuteqartitsilluni tuttniarnissamut piffissamik piniarfusussamik aalajangersaassaaq.  
*Imm. 2.* Imm. 1-imi piffissat piniarfusussat taamaallaat piffissap 1. augustip aamma 30. aprilip iluani aalajangersaaffigineqarsinnaapput.  
*Imm. 3.* Piniarnej pillugu Siunnersuisoqatigiit aamma Kattuffiit suliamut attuumassuteqartut allat apeqqutini imm. 1-imi tunngassuteqartuni tusarniarneqassapput.  
*Imm. 4.* Sumiiffinni ataasiakkaani tuttnut piffissanik piniarfusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattarpaat.  
*Imm. 5.* Kommunimi oqartussat Piniarnermut Naalakkersuisoqarfimmut piffissat piniarfusussat inerneru pillugit imm. 4 naapertorlugu allakkatigut nalunaaruteqassapput.

*Sumiiffinnik tuttniarfusussanik aalajangersaaneq*

**§ 5.** Uumassuilinnik misissuisunik siunnersuuteqareernerup kingorna Piniarnermut Naalakkersuisoq sumiiffinnik tuttniarfusussanik killilersukkamik piniarfusussanik aalajangersaassaaq.  
*Imm. 2.* Piniarnej pillugu Siunnersuisoqatigiit aamma Kattuffiit suliamut attuumassuteqartut allat apeqqutit imm. 1-imi pineqartuni tusarniarneqassapput.  
*Imm. 3.* Sumiiffinni ataasiakkaani tuttnut sumiiffinnik piniarfusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattarpaat.  
*Imm. 4.* Kommunimi oqartussat Piniarnermut Naalakkersuisoqarfimmut sumiiffiit piniarfusussat aalajangersaaneri pillugit imm. 3 naapertorlugu allakkatigut nalunaaruteqassapput.

**Kapitali 4**

*Pisassiissuteqarnermi piumasaqaatit*

**§ 6.** Inuit § 8 malillugu akuersissummik, kiisalu piniarnermut allagartamik atuuttumik peqartut kisimik tuttniaqquusaapput.  
*Imm. 2.* Akuersissut inummut atiatigut taasamut taamaallaat atuuppoq allanullu tunniunneqaraniluunniit

tunineqarsinnaanani.

*Imm. 3.* Akuersissummi allassimavoq sumi qassinillu tuttunniartoqarsinnaanersoq.

*Imm. 4.* Piniarnermut allagartaq 1. maj sioqqullugu akilerneqassaaq, § 24-li takuuk.

**§ 7.** Inuussutissarsiutigalugu tuttunniarsinnaanermut akuersissummi piumasarineqarsinnaavoq tuttumik ilivitsumik ilaanilluunniit tunisinissaq uumasut nakorsaqaarfianiit akuerineqarsi-masunut neqaarniarfinnut tunitsivinnulluunniit pissasoq imaluunniit inuussutissarsiutigalugu piniartaq tunisinissamut akuersissummik atuuttumik peqassasoq.

*Imm. 2.* "Kalaalimineerniarfinni" tunisinissaq aamma tuniniaanissaq pillugu kommunit ataasiakkaat namminneq sunngiffimmi piniarnermut allagartamik pigisalinnut aalajangersaassap-put.

*Imm. 3.* "Kalaalimineerniarfinni" tuttnik tunisineq inuussutissalerinermut tunngasuni nalunaarummi atuuttumi piumasaqaatit malillugit ingerlanneqassaaq tuniniaanerlu taamaallaat piffissani piniarfusuni aamma piffissap piniarfusup qaangiunneranit amerlanerpaamik ulluni pingasuni atuuppoq.

## Kapitali 5

### *Piniagassatut pisassiissutinut akuersissutinik tunniussineq agguaassinerlu*

**§ 8.** Kommunit pineqartut qinnuteqartunut piniarnermut allagartamik atuuttumik peqartunut aamma sumiiffimmi ingerlatsivinni inuit allattorsimaffianni najugalittut nalunaarsorsimasunut akuersissutinik agguaassissapput tunniussillutillu.

*Imm. 2.* Naak imm. 1-imi aalajangersagaqaraluartoq, Piniarnermut Naalackersuisoqarfik inunnut sumiiffinni ingerlatsiviusuni allani najugaqartunut sumiiffimmi ingerlatsiviusumi piniarsinnaanerannik akuersissuteqarsinnaavoq tamannalu sumiiffimmi ingerlatsiviusumi pineqartumi ammasumik pisassiisoqartillugu aatsaat pisinnaavoq.

*Imm. 3.* Akuersissummi qinnuteqartut piffissap qinnuteqarfusup nalaani 16-inik ukioqale-reersimassapput.

**§ 9.** Akuersissutinik tunniussineq ima pissaaq, qinnuteqartut ataasiakkaat sapinngisamik tamarmik sumiiffiup ingerlatsiviusup iluani akuersissutinik assigiimmik amerlassusilerlugit tunineqarnerisigut.

*Imm. 2.* Qinnuteqartut akuersissutinit amerlaneruppata agguaassineq makitsinikkut pissaaq. Akuersissutit sinneruttut aamma makitsinikkut agguaanneqassapput.

*Imm.3.* Sumiiffinni ingerlatsiviusuni isorartuuni piniartunut ataasiakkaanut piniarneq akiler-sinnaasunngortinniarlugu akuersissutinik arlaqartunik tunniussisoqarsinnaavoq.

*Imm. 4.* Makitsinermut atatillugu akuersissutinik tunniussisussaataasup utaqqisut allattorsimaffiat pilersissavaa, taannalu akuersissutit agguaanneqaqqinneranni § 10, imm. 2 naapertorlugu atorineqassaaq.

*Imm. 5.* Makitsineq tamanut ammasumik ingerlanneqassaaq. Akuersissutinik tunniussisussaataasup makitsinissaq kingusinnerpaamik sapaatip akunneranik sioqqutsilluni, makitsinermut piffissaq sumiinnissaalu tamanut nalunaarutigissavaa.

**§ 10.** Makitsinermut atatillugu akuersissutinik tunniussisussaataasooq akuersissutit tunniun-neqartut qaqugu aaneqareersimanissaannik aalajangiissaaq. Inuit akuersissummik tunineqarsimasut akuersissummilli atuisinnaanngitsut imaluunniit atuiniangitsut piaarnerpaamik akuersissutit

atorneqanngitsut akuersissutitik tunniussisussaataasumut utertissavaat.

*Imm. 2.* Akuersissutit aaneqanngitsut utertinneqarsimappatalu agguateqqinneqassapput.

Agguasseqqinneq siusinnerpaamik tuttunniarnerup uninnissaa sapaatip akunnerinik sisamanik sioqqullugu pisinnaavoq, akuersissutitik pinissamik utaqqisut allattorsimaffiat naapertorlugu.

## Kapitali 6

### *Piniariaatsit aamma piniarnermi ileqqorissaarneq*

**§ 11.** Tuttunniarnermi qoorortuut pisissillu atorneqaqqusaapput.

*Imm. 2.* Sulloqqortussutit akuerisat minnerpaaffiat tassaavoq .222. Qoorortuut imassaasat nammineq toqqarneqarsinnaapput.

*Imm. 3.* Qoorortuut eqiinnartakkat eqittaannartakkallu tuttunniarnermi atorneqarnissaat inerteqqutaavoq.

*Imm. 4.* Aallaat sunaluunniit imm. 2 malillugu piniarnermut atorneqaqqusaasoq nakersarneqarsimassaaq paarilluagaallunilu.

*Imm. 5.* Pisisseq atorlugu tuttunniarneq inunnit Kalaallit Nunaanni Danmarkimi imaluunniit nunani allani pisissimik piniarnermut misilitsinnermi takussutissartalimmik angusaqarsima-sunit ingerlanneqarsinnaavoq.

*Imm. 6.* Pisissimut, qarsunut naqqumullu piumasaqaatit:

1) Pisisseq Compound-iussaaq (katitigaq / nutaaliaasoq), pisisseq aaqqinneqarsinnaasumik umerfeqassaaq / nalunaaqutaqassaaq qarsullu naqqui aalajangersimasut atorneqartillugit nusutsisinnaassusaa minnerpaamik 45 pund-iussaaq (21 kg.), qarsullu naqqui mekanisk-iusut atorneqartillugit nusutsisinnaassusaa minnerpaamik 55 pund-iussalluni (25 kg.).

2) Qarsut naqqui aalajangersimasut atorneqartillugit qarsut minnerpaamik 385 grains-inik (25 gr.-inik) oqimaassuseqassapput, qarsullu naqqui mekaniskiusut atorneqartillugit qarsut minnerpaamik 425 grains-inik (28 gr.-inik) oqimaassuseqassallutik.

3) Qarsut naqqui aalajangersimasut imaluunniit mekaniskiusut atorneqaqqusaapput.

**§ 12.** Piniarnermi tuttip pisarineqartup neqaa tamaat nassarneqassaaq. Piniarnermit pisap sinneri sapinngisamik pisaqarfup qimalernerani nassarneqassapput imaluunniit tupeqarfiit, illuaraqarfiit imaluunniit akiliuteqarluni piniarnerup ingerlanneqarnissaa akornusernagit inissinneqassallutik.

## Kapitali 7

### *Akiliuteqarluni piniarnermut immikkut piumasaqaatit*

**§ 13.** Piniarnermut Naalakkersuisoq pisassiissutitik piniarnerup aamma akiliuteqarluni aallaaniarnerup akornanni pisassiissutitik agguataarinermik aalajangersaassaaq.

*Imm. 2.* Piniarnermut Akiliuteqarluni aallaaniarnermut pisassiissutit tuttunniarnissamut pisassiissutinit tamarmiunit § 3-mi imm. 1 naapertorlugu tiguneqassapput.

*Imm. 3.* Naak § 4-mi, imm. 2-mi, aalajangersagaqaraluartoq Piniarnermut Naalakkersuisup ukioq kaajallallugu pannernik akiliuteqarluni aallaaniarnissamut piffissanik piniarfusussanik aalajangersaasinnaavoq.

*Imm. 4.* Kulavannik norrarnillu akiliuteqarluni aallaaniarneq piffissap 1. januarimiit 1. augustip tungaanut inertequtaavog.

*Imm. 5.* Sulloqqortussutit akuerisat minnerpaaffiat tassaavog .243. Qoorortuut imassaat nammineq toqqarneqarsinnaapput.

*Imm. 6.* Qoorortuut eqiinnartakkat eqittaannartakkallu tuttunniarnermi atorneqarnissaat inertequtaavog.

*Imm. 7.* Pisseq atorlugu akiliuteqarluni tuttunniarneq inunnit Kalaallit Nunaanni Danmarkimi imaluunniit nunani allani pisissimik piniarnermut misilitsinnermi takussutissartalimmik angusaqarsimasunit ingerlanneqarsinnaavog.

*Imm. 8.* Pisissimut, qarsunut naqqumullu piunasaqaatit:

1) Pisseq Compound-iussaaq (katitigaq / nutaaliaasoq), pisseq aqqinneqarsinnaasumik umerfeqassaaq / nalunaaqutaqassaaq qarsullu naqqi aalajangersimasut atorneqartillugit nusutsisinnaassusaa minnerpaamik 45 pund-iussaaq (21 kg.), qarsullu naqqi mekanisk-iusut atorneqartillugit nusutsisinnaassusaa minnerpaamik 55 pund-iussalluni (25 kg.).

2) Qarsut naqqi aalajangersimasut atorneqartillugit qarsut minnerpaamik 385 grains-inik (25 gr.-inik) oqimaassuseqassapput, qarsullu naqqi mekanisk-iusut atorneqartillugit qarsut minnerpaamik 425 grains-inik (28 gr.-inik) oqimaassuseqassallutik.

3) Qarsut naqqi aalajangersimasut imaluunniit mekaniskiusut atorneqaqqusaapput.

*Imm. 9.* Akiliuteqarluni tuttunniarnermi pisat § 19-mi aalajangersagaqaraluartorluunniit *PINIARNEQ*-mut nalunaarutigineqassapput. Akiliuteqarluni piniartitsinermik aqqissuisut Piniarnermut Naalackersuisoqarfimmut nalunaaruteqassapput. Tamatuma kingorna paasissutissat katersukkat *PINIARNEQ*-mut nassiunneqassapput.

## **Kapitali 8**

### *Tuttu assartorneqarneranni assartuutininik atuineq*

**§ 14.** Assartuutit tuttnik malersuineri ungoorinermiluunniit atorneqaqqusaanngillat.

*Imm. 2.* Assartuutit taamaallaat aqutit aalajangersimasut akuerisaasut (korridorit) aqutigalugit atorneqaqqusaapput Avatangiisinullu Pinngortitamullu Naalackersuisoqarfimmiit akuersissuteqaraanni aatsaat atorneqaqqusaallutik kiisalu piniarfimmut piniarfimmiillu assar-tuinnermut taamaallaat atorneqaqqusaallutik. Assartuutininik nunami ingerlaarnermut atatillugu minnerpaamik 500 meterinik ungasissuseqarluni tuttnu uumasut qanillineqaqqusaapput.

*Imm. 3.* Tuttunniarnermi qimmit nassaqqusaanngillat, taamaattorli imm. 4-6-imut pineqartut pineqanngillat.

*Imm. 4.* Qimminik qimuttoqarfiusuni allorniusami kangimukartup 44° W-mi avannamukartullu 66° N-mi qimussit assartuutitut atorneqaqqusaapput.

*Imm. 5.* Piniarfimmi qimminik qimuttunik qimatsisoqaqqusaanngilaq. Qimmit pituussaarlutik qimaasut tigoqqinnerlu sapernartut piaarnerpaamik aallaaneqassapput. Qimmit toqungasut timaat piniarfimmi qimanneqaqqusaanngillat. Kingusinnerpaamik piniariarnerup naammassinerata kingornatigut qimmit qimaasut pillugit politiit nalunaarfigineqassapput.

## **Kapitali 9**

### *Tuttunik pissatanik toqutsineq*

§ 15. Piniartup pisussaaffigaa tuttu eqqorneqarnermi kinguninnguagut toqusimanera nalornisiginagu paasissallugu.

*Imm. 2.* Tuttuniarnerup nalaani tuttumik pissaasup pisussaaffigaa sapinngisamik piaarnerpaamik taassuminnga toqutsinissani.

*Imm. 3.* Tuttu pissanneqartoq nanineqarnanilu toqunneqanngippat, piniartuq piniarnerup naammassineqarnerata kinguninnguagut Piniarnermut Naalackersuisoqarfimmut imaluunniit piniarnermut aallaaniarnermullu nakkutilliisumut pissutsit piviusut pillugit ilisimatitsissaaq.

*Imm. 4.* Inuk tuttumik pissanneqarsimasumik sulilu uumasumik takunnittoq, ajornanngippat tuttu toqussavaa. Piffissap piniarfiusup avataani toqutsineq pisimappat tuttu toqutaq nikisinnagu qimanneqassaaq. Tuttumik toqutsineri akisussaasup pisussaaffigaa toqutsinerup qanoq pisimanera Piniarnermut Naalackersuisoqarfimmut imaluunniit piniarnermut aallaaniarnermut nakkutilliisumut nalunaarutigissallugu.

*Imm. 5.* Tuttu toqungasoq siumorneqartoq nikisinnagu qimanneqassaaq.

## **Kapitali 10**

### *Uumatillugit tiguserit nuussinerillu*

§ 16. Piniarnermut Naalackersuisoq sioqqutsisumik akuersitinneqarsimatinnagu tuttu nujitsut nuunneqarnissaat, tiguneqarnissaat aammalu ungalusat iluiniitinneqarnissaat inerteqqutaavoq.

## **Kapitali 11**

### *Kommunit ileqqoreqqusat*

§ 17. Kommunimi ileqqoreqqusakut kommunalbestyrelsi nalunaarut manna naapertorlugu annertunerusumik piumasaqaateqarsinnaavoq, nalunaarutip § 3, imm. 1-imiit 3-mut, § 4, imm. 1-imiit 2-mut aamma § 14, imm. 1-imiit 2-mut aalajangersakkanit sakkortunerusunik.

*Imm. 2.* Kommunimi ileqqoreqqusat Piniarnermut Naalackersuisumit atuutilersinneqassaaq.

## **Kapitali 12**

### *Najukkami ingerlatsineq*

§ 18. Piniarneq pillugu Siunnersuisoqatigiinnik allanillu kattuffinnik suliamut attuumassutilinnik tusarniaareernerup kingornatigut Piniarnermut Naalackersuisoq nunap ilaani sumiif-fimmi killilikkami ingerlatsinerimik tamarmiusumik imaluunniit ilaannakuusumik, sumiifin-nut ingerlatsiviusunut agguaassisinnaavoq.

*Imm. 2.* Tamatumani piumasaqaatit Piniarnermut Naalackersuisup aamma akuersissutinik tunniussisusaatitaasut akornanni allaganngorlugit isumaqatigiissutigineqassapput.

### **Kapitali 13**

#### *Pinngortitami uumassuilinnik misissuinernut nalunaaruteqartarnej*

§ 19. Pisanik nalunaaruteqarnej imaluunniit pisanik nalunaarsuutininik kommunimut tunniussineq piniarnerup naammassineqarnerata kingornatigut kingusinnerpaamik sapaatip akunnerisa marluk qaangiunneranni pissaaq. Tamatuma kingornatigut paasissutissat ataatsimoortillugit piniarnerup naammassineqarnerata kingornatigut kingusinnerpaamik sapaatip akunnerisa sisamat qaangiunneranni kommunimit Pinngortitaleriffimmut nassiunneqassapput.

*Imm. 2.* Tuttu angallammut pisanianut angallataasussamut ikineqarpat, akuersissutip tunuatigut kalerriummumut immersugassaaq kingusinnerpaamik immersorsimassaaq.

### **Kapitali 14**

#### *Pisanik nujuartanik nalunaarutiginnittarnej*

§ 20. Tuttunik pisat tamarmik aamma pissatat naak § 19-mi aalajangersagaqaraluartoq, *PINIARNEQ*-mi ukiumoortumik immersugassiaq atorlugu nalunaarutigineqassapput.

### **Kapitali 15**

#### *Nakkutilliineq*

§ 21. Kinaluunniit politiinit imaluunniit piniarnermik aallaaniarnermillu nakkutilliisunit tuttunniarsinnaatitaanini uppersarsaqullugu qinnuigineqaruni, taava akuersissut atuuttoq kiisalu piniarsinnaanermut allagartaq atuuttoq takutissavai.

### **Kapitali 16**

#### *Immikkut akuersissuteqartarnej*

§ 22. Piniarnermut Naalakkersuisoqarfik nalunaarummi matumani aalajangersakkanit ilisimatusarnikkut aamma ilinniartitsinerumut atatillugu piniarsinnaanermut immikkut akuersissu-teqarsinnaavoq. Uani piumasarineqarluni ilisimatusarnikkut ilinniartitsinermullu tunngasut uumasunik illersuineq pillugu kiisalu uumasut peqqinnerat pillugu maleruagassat malillugit ingerlanneqassasut.

§ 23. Tuttut navianartorsiortitsisut imaluunniit angallannerumut atatillugu annertuumik akornusersuisut qimaatinneqarsinnaasimangippata toqunneqarsinnaapput.

*Imm. 2.* Imm. 1 naapertorlugu tuttut toqutat Kalaallit Nunaanni Namminersorlutik Oqartussanut pigisussanngortinneqassapput. Tuttumik toqutsinermi akisussaasup pisussaaffigaa toqutsinerup qanoq pisimanagera Piniarnermut Naalakkersuisoqarfimmut nalunaarutigissallugu. Tuttup toqunneqartup qanoq pineqarnissaa Naalakkersuisoqarfup aalajangissavaa.

§ 24 Naak § 6-imi imm. 4-mi aalajangersagaqaraluartoq ingerlatsinermi pissutsit aallaavigalugit piniarnerumut allagartap 1. maj sioqqullugu akilerneqarsimanissaanik piumasqaammit immikkut ittumik akuersissutigineqarsinnaavoq.

## Kapitali 17

### *Pineqaatissiisutit*

§ 25. Nalunaarummi matumani aalajangersakkanik unioqqutitsineq akiliisitsinermik pineqaatissiisutaasinnaavoq aamma sunngiffimmi aallaaniarsinnaanermut allagartat imaluunniit inuussutissarsiutigalugu piniarnermut allagartat piffissami killilikkami arsaarinnissutaasinnaapput.

*Imm. 2.* Tuttu nalunaarummi malittarisassanut akerliusumik pisaq Kalaallit Nunaanni pinerluttulerinermi inatsisini malittarisassatigut aalajangersakkat malillugit arsaarinnissutigineqarsinnaavoq.

*Imm. 3.* Kommunitut ileqqoreqqusaliani § 17 naapertorlugu, kommunalbestyrelsip aalajangersarsinnaavaa, ileqqoreqqusaliani aalajangersakkanik unioqqutitsineq Kalaallit Nunaanni pinerluttulerinermi inatsisini malittarisassatigut aalajangersakkat malillugit akiliisitaanermik arsaarinnissummillu pineqaatissiisutaasinnaasoq.

## Kapitali 18

### *Atulersitsineq il.il.*

§ 26. Nalunaarut manna atuutilerpoq ulloq 27. juni 2013.

*Imm. 2.* Peqatigitillugu Namminersornerullutik Oqartussat tuttu piniagaanerat pillugu nalunaarutaat nr. 6, 8. februar 2001-imeersoq, kingullermik Namminersornerullutik Oqartussat nalunaarutaannit nr. 19, 16. juli 2002-meersukkut allangortinneqartoq, kiisalu tuttu illersugaanerata pillugu Namminersornerullutik Oqartussat nalunaarutaat nr. 8, 8. februar 2001-imeersoq atorunnaarsinneqarput.

*Namminersorlutik Oqartussat, ulloq 27. juni 2013.*

Karl Lyberth

/

Jens K. Lyberth

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut